

Ultimo presentacion di Wizard Of Oz na Cas di Cultura



ORANJESTAD- Diasabra ultimo a tuma luga na cas di Cultura e ultimo presentacion di e obra teatral di Wizard of Oz na Cas di Cultura cu un elenco completamente local.

Segun un relato di prensa riba e prome biaha cu e obra aki a wordo e sala tabata yen yen y tabata uno exitoso. Esaki tabata riba dia 26 di mei ultimo. Yon - Xin Cao, un hobencita cu a bay pa wak su ruman participa den e obra. Ta conta Bon Dia Aruba cu e presentacion tabata hopi leuk. "Bo por a wak cu e muchanan a disfruta di dje paso durante e show e hendenan tabata

interactua cu e muchanan tambe" Xin Cao a comenta. Tambe Xin Cao a bisa cu e sala no tabata mes yen cu e prome edicion. Esaki segun e por ta paso e orario. Tal bes e orario tabata mucho trempa, e prome edicion tabata 7:30 di anochi mientras cu esaki tabata 5:30 di atardi. Esun biaha pasa tabata den siman tambe, Xin Cao a bisa.

Directora di e obra esta Patty Cabrera a conta Bon Dia Aruba cu despues di e presentacion nan a Sali dispidi e publico y e mayornan. Segun sra. Cabrera e mayornan a expresa nan mes hopi bon di e obra bisando cu nunca nan a

yega di wak un obra di e calidad aki. E muchanan a gosa hopi, hendenan un poco mas grandi di edad a comenta cu nan wordo hiba bek na tempo di nan infancia y a sinti mescos cu mucha den e sala. Sra. Cabrera a comenta cu nan ta haciendo areglo pa wak si nan por ripiti e obra un biaha mas den algun centro di bario, pero nan kier pa e produccion ta di mesun calidad cu na Cas di Cultura, pues e ora placa ta hunga un rol importante.

Artista nan den e obra
Bon Dia Aruba a publica riba

dia di 8 di september cu dicho relato ta subraya cu despues di varios luna di preparacion e tayer di Arte terapia "Crea y Siña" lo presenta e comedia musical hunto cu artistanan profesional manera, Faritha luidens, mas conoci como Tica basha abao. Den e comico rol di e bruha. E ta representa e maldad di mundo, e mundo di scuridat cu ta purba pa destrui soñonan. Lukee Croes ta representa e Fairy, cu ta guia Dorothy pa haya e caminda pa bay bek cas. Fernando Luidens, lo interpreta e rol di shon bleki, ta buscando un curason pa asina por stima bek. Ferdinand Franca, docente di scol y conoci den nos comunidad pa su aportacion na folklore, segun e relato. Lo interpreta el rol di Wantomba, cu ta den busca di un cerebro pa asina solucion tur e problemanan di Aruba. Litja Osorio Leon Cobarde, cu ta hiba Dorothy y su amigonan traves di henter e mondi, buscando curashi. Angela Croes, conoci



cantante Spanjo cu ta desaroyando su habilidad nan den actuacion, ta interpreta e rol di Luna caminda e ta canta e cantica. "Somewhere over the rainbow". Tambe ta hunga un segundo rol di shima-rucu, interpretando un cantica di su ultimo produccion musical. Ta spierta Dorothy di e peligran di e caminda di scuridat. Lyonel Dirks, ta representa e rol di The Wizard of Oz. E ta siña Dorothy su amigonan cu hopi biaha nos ta busca afo kico nos tin aden, tambe ta hunga e rol di Tio Henry. Rachel Alberga, ta interpreta e rol di Toto, e cachito inseparabel di Dorothy, jui muhe di sra. Cabrera, cu ta representa e rol di Dorothy un mucha muhe cu ta den busca pa descubri cosnan nobo, ta pasa den diferente aventura y ta conoce hopi amigonan nobo, pero na final ta descubri cu a pesar cu bo por pasa leuk cu bo amigonan no tin nada mas dushi pa ta na cas. □

